

Na osnovu članova 2., 9. i 11. Zakona o udruženjima i fondacijama Brčko distrikta („Službeni glasnik Brčko distrikta Bosne i Hercegovine“, brojevi 12/02 i 19/07), Osnivačka skupština Samostalnog sindikata zaposlenih u predškolskom, osnovnom i srednjem obrazovanju u Brčko distriktu Bosne i Hercegovine, na sjednici održanoj 06. 12. 2018. godine, donosi

S T A T U T

Samostalnog sindikata zaposlenih u predškolskom, osnovnom i srednjem obrazovanju u Brčko distriktu Bosne i Hercegovine

I OPĆE ODREDBE

Član 1. (Predmet)

Ovim statutom uređuju se pitanja od značaja za rad Samostalnog sindikata zaposlenih u predškolskom, osnovnom i srednjem obrazovanju u Brčko distriktu Bosne i Hercegovine, i to: naziv i sjedište; ciljevi, zadaci i djelatnost; zastupanje i predstavljanje; članstvo, prava i obaveze, prestanak članstva; organi, njihove ovlasti, način imenovanja i opoziva, trajanje mandata, kvorum i pravila glasanja; organizacija; obilježja; imovina, način sticanja i raspolaganja sredstvima; kolektivno pregovaranje; štrajk i mjere zaštite; stručna služba; javnost rada; Statut i drugi opći akti; prestanak rada; prelazne i završne odredbe.

II NAZIV, SJEDIŠTE I PODRUČJE DJELOVANJA

Član 2. (Naziv, sjedište i područje djelovanja)

Puni naziv udruženja je: Samostalni sindikat zaposlenih u predškolskom, osnovnom i srednjem obrazovanju u Brčko distriktu Bosne i Hercegovine.

Skraćeni naziv udruženja je: Sindikat zaposlenih u obrazovanju u Brčko distriktu BiH.

Sjedište Samostalnog sindikata zaposlenih u predškolskom, osnovnom i srednjem obrazovanju u Brčko distriktu Bosne i Hercegovine je u Brčkom, u ulici Danila Kiša broj 10.

Samostalni sindikat zaposlenih u predškolskom, osnovnom i srednjem obrazovanju u Brčko distriktu Bosne i Hercegovine ima svojstvo pravnog lica.

III PROGRAMSKI CILJEVI I DJELATNOST

Član 3. (Programski ciljevi)

Samostalni sindikat zaposlenih u predškolskom, osnovnom i srednjem obrazovanju u Brčko distriktu Bosne i Hercegovine je samostalna, dobrovoljna, nevladina, vanstranačka, interesna i neprofitna organizacija zaposlenika u institucijama i ustanovama u predškolskom, osnovnom i srednjem obrazovanju u Brčko distriktu Bosne i Hercegovine.

Programski ciljevi Samostalnog sindikata zaposlenih u predškolskom, osnovnom i srednjem obrazovanju u Brčko distriktu Bosne i Hercegovine (u daljem tekstu: Sindikat) su:

- a) razvoj demokratskih procesa i izgradnja pravne i socijalne države sa jednakim šansama i pravima za sve,
- b) ostvarivanje i zaštita interesa članova,
- c) obezbjeđivanje odgovarajućih uslova rada i uvođenje savremenih sredstava i tehnologija, s ciljem uspješnijeg obavljanja poslova zaposlenih u predškolskom, osnovnom i srednjem obrazovanju u Brčko distriktu Bosne i Hercegovine,
- d) postizanje najpovoljnijih zarada,
- e) ugovaranje i utvrđivanje najkvalitetnije cijene rada svog članstva,
- f) zalaganje za poboljšanje i jedinstveno demokratsko uređenje radnog i socijalnog prava i druge odnose koji uređuju radne odnose i druga pitanja vezana za život i rad u predškolskom, osnovnom i srednjem obrazovanju u Brčko distriktu Bosne i Hercegovine,
- g) obezbjeđenje besplatne pravne zaštite za članove, uključujući i zastupanje u disciplinskim i sudskim postupcima za utvrđivanje odgovornosti iz radnog odnosa, odnosno zaštite prava iz radnog odnosa pred nadležnim sudovima u skladu sa mogućnostima,
- h) davanje pravnih savjeta članovima iz oblasti radnih odnosa i druge vidove pomoći i podrške,
- i) iniciranje i učestvovanje u pripremi i predlaganju zakona i podzakonskih akata koji regulišu sistem predškolskog, osnovnog i srednjeg obrazovanja u Brčko distriktu Bosne i Hercegovine,
- j) kontinuirano djelovanje s ciljem obezbjeđivanja odgovarajućih uslova rada u skladu sa pedagoškim standardima,
- k) pružanje materijalne pomoći članovima u skladu sa mogućnostima,
- l) školovanje, obrazovanje, stručno usavršavanje i sticanje novih znanja i sposobnosti za efikasnije vršenje poslova na radnom mjestu,
- m) organizovanje edukativnih stručnih seminara za članove,
- n) učlanjivanje u Samostalni sindikat zaposlenih u predškolskom, osnovnom i srednjem obrazovanju u Brčko distriktu Bosne i Hercegovine što većeg broja osoba iz reda zaposlenih u predškolskom, osnovnom i srednjem obrazovanju u Brčko distriktu Bosne i Hercegovine,
- o) poboljšanje i jedinstveno demokratsko uređenje radnog prava i ekonomsko-socijalnog prava uz korištenje zakonodavne inicijative,
- p) iniciranje rješavanja problema prekobrojnosti i pitanja zapošljavanja zaposlenika koji su postali prekobrojni, odnosno tehnološki višak,
- r) razvijanje obrazovanja koje će otkloniti sve vidove diskriminacije djece, učenika, odgajatelja i nastavnika u odnosu na naciju, vjeru, rasu, spol i etničku pripadnost,
- s) praćenje da li se potpuno i dosljedno primjenjuju odredbe radno-pravnog zakonodavstva, rezolucije MOR-a, povelje, kolektivni ugovori, podzakonski akti pravilnici i drugi akti,
- t) saradnja sa ostalim udruženjima u Bosni i Hercegovini i inostranstvu u skladu sa zakonom i zahtjevima članstva.

Sindikat će obavljati sljedeće djelatnosti:

- a) 94.20 Djelatnosti sindikata
- b) 94.99 Djelatnosti ostalih članskih organizacija, d.n.

Član 4.

(Principi i sredstva sindikalnog djelovanja)

Principi sindikalnog djelovanja su:

- a) jedinstvo interesa svojih članova,
- b) demokratičnost u donošenju svojih odluka na svim nivoima,
- c) javnost rada,
- d) efikasnost, racionalnost i samostalnost u radu,
- e) solidarnost članova,
- f) nezavisnost i odgovornost članstva i organa za izgrađivanje i realizaciju stavova.

Sredstva sindikalnog djelovanja su:

- a) pravo na zakonodavnu inicijativu i učešće u kreiranju zakona i drugih propisa od interesa za članstvo ovog Sindikata,
- b) isticanje zahtjeva svim organima i institucijama, udruženjima, poslodavcima i pojedincima od čijeg angažovanja zavisi ostvarivanje i zaštita prava članova ovog Sindikata,
- c) pregovaranje sa poslodavcima i drugim institucijama i ustanovama u kojima se odlučuje o pitanjima od interesa za članstvo ovog Sindikata,
- d) organizovanje protesta, bojkota i drugih akcija sa ciljem ostvarivanja zaštite i interesa članstva ovog Sindikata,
- e) štrajk.

Odluke o načinu ostvarivanja svojih ciljeva i upotrebi sredstava sindikalne borbe donose organi ovog Sindikata.

IV ZASTUPANJE I PREDSTAVLJANJE SINDIKATA

Član 5.

(Predsjednik Sindikata)

Sindikata zastupa i predstavlja predsjednik Sindikata.

U postupcima u kojima Sindikat učestvuje kao stranka radi ostvarivanja svojih prava, dužnosti i odgovornosti pred nadležnim sudovima, predsjednik Sindikata može dati pismenu punomoć za zastupanje advokatu ili drugom stručnom licu.

U slučaju spriječenosti predsjednika, Sindikat zastupa jedan od zamjenika po ovlaštenju predsjednika.

V PRAVA, DUŽNOSTI I PRESTANAK ČLANSTVA

Član 6.

(Pristup u članstvo Sindikata)

Članom Sindikata mogu postati svi zaposleni u predškolskom, osnovnom i srednjem obrazovanju u Brčko distriktu Bosne i Hercegovine osim funkcionera koji predstavljaju poslodavca.

Pristup u članstvo Sindikata je dobrovoljno.

Učlanjenje se vrši u sindikalnoj organizaciji davanjem pisane izjave (pristupnice) predsjedniku - povjereniku sindikalne organizacije (u daljem tekstu: predsjednik sindikalne organizacije).

Po prijemu u članstvo Sindikata, članu se izdaje članska knjižica kojom dokazuje članstvo. O izgledu i sadržaju članske knjižice odlučuje Upravni odbor Sindikata. Članska knjižica je vlasništvo ovog Sindikata.

Prilikom korištenja usluga ovog Sindikata, član je dužan pokazati svoju člansku knjižicu.

Član 7.

(Prava člana Sindikata)

Član Sindikata ima pravo da:

- a) slobodno iznosi svoje stavove, mišljenja i aktivno učestvuje u ostvarivanju ciljeva i zadataka Sindikata,
- b) bude biran i neposredno učestvuje u kandidovanju, predlaganju i biranju članova organa ovog Sindikata,
- c) zahtijeva pravnu zaštitu svojih prava iz radnog odnosa,
- d) sudjeluje u nadzoru rada Sindikata i sindikalne organizacije,
- e) inicira donošenje odluka u skladu sa ovim Statutom,
- f) zahtijeva pokretanje postupka za utvrđivanje odgovornosti rukovodstva Sindikata i organa Sindikata,
- g) sudjeluje u aktivnostima sindikalne borbe koju provodi Sindikat.

Član 8.

(Dužnosti člana Sindikata)

Član Sindikata ima dužnost da:

- a) poštuje odredbe ovog Statuta i drugih općih i pojedinačnih akata Sindikata,
- b) savjesno vrši funkcije na koje je izabran i imenovan u Sindikatu,
- c) uvijek djeluje solidarno u korist zajedničkih interesa članova ovog Sindikata bez obzira na okolnosti,
- d) redovno plaća članarinu,
- e) predsjedniku sindikalne organizacije prijavi svaku promjenu koja se odnosi na mjesto stanovanja, rada, kao i druge potrebne promjene od značaja za članstvo u Sindikatu,
- f) izvršava ostale obaveze određene Statutom i drugim općim i pojedinačnim aktima Sindikata, kao i obaveze koje nalažu organi ovog Sindikata.

Član 9.

(Prestanak članstva u Sindikatu)

Članstvo u Sindikatu prestaje:

- a) dobrovoljnim istupanjem,
- b) smrću člana.

Ako član Sindikata želi dobrovoljno istupiti iz članstva, dužan je svoju pismenu izjavu dostaviti predsjedniku sindikalne organizacije i predati svoju sindikalnu knjižicu.

Osoba može ponovo postati član ovog Sindikata davanjem pisane izjave (pristupnice) predsjedniku sindikalne organizacije i ispunjavam ostalih obaveza u skladu sa odredbama ovog Statuta, odluka i drugih akata Sindikata.

Prestankom članstva iz bilo kojih razloga utvrđenih odredbama ovog Statuta, prestaju i sva prava po osnovu članstva u Sindikatu.

Član 10.

(Isključenje iz članstva u Sindikatu)

Član Sindikata bit će isključen iz članstva u sljedećim slučajevima:

- a) neplaćanjem članarine duže od četiri mjeseca u toku jedne kalendarske godine,
- b) ako se ne pridržava odredaba ovog Statuta, odluka i drugih akata Sindikata,
- c) ako štetno djeluje prema Sindikatu.

Odluku o isključenju iz članstva donosi Upravni odbor Sindikata.

Osoba koja je isključena iz članstva u slučaju iz stava a) ovog člana može ponovo postati član ovog Sindikata davanjem pisane izjave (pristupnice) predsjedniku sindikalne organizacije uz predočjenje dokaza o izmirenom dugu po osnovu članstva u ovom Sindikatu od momenta isključenja iz članstva do zaključno sa danom davanja pisane izjave (pristupnice).

Odluku o prijemu u članstvo donosi Upravni odbor Sindikata.

Prestankom članstva iz bilo kojih razloga prestaju i sva prava po osnovu članstva u Sindikatu.

Osoba koja je isključena iz članstva u slučaju iz stava b) ili c) ovog člana, ne može ponovo postati član ovog Sindikata.

Član 11.

(Imenovanje na rukovodeće funkcije u predškolskom, osnovnom i srednjem obrazovanju)

Izborom i imenovanjem člana Sindikata na rukovodeće funkcije u predškolskom, osnovnom i srednjem obrazovanju u Brčko distriktu Bosne i Hercegovine, njegova sindikalna prava i dužnosti miruju.

Član Sindikata izabran i imenovan na funkciju može i dalje plaćati sindikalnu članarinu.

Član 12.

(Članstvo u organima političkih stranaka)

Članovi Sindikata koji budu izabrani u organe političkih stranaka ne mogu biti birani u organe i tijela ovog Sindikata.

Član 13.

(Izbor i imenovanje u izvršnoj i zakonodavnoj vlasti)

Članovi Sindikata koji budu izabrani i imenovani u izvršnoj ili zakonodavnoj vlasti svih nivoa u Bosni i Hercegovini ne mogu biti birani u organe i tijela ovog Sindikata.

VI ORGANI SINDIKATA

Član 14. (Organi Sindikata)

Organi Sindikata su:

- a) Skupština,
- b) Upravni odbor,
- c) Nadzorni odbor.

1. SKUPŠTINA SINDIKATA

Član 15. (Članovi i sazivanje Skupštine)

Skupština je najviši organ Sindikata.

Skupštinu sačinjavaju delegati koje izaberu sindikalne organizacije.

Skupština imenuje predsjednika i zamjenika predsjednika Skupštine na mandatni period od dvije godine sa mogućnošću obnavljanja mandata. U slučaju odsutnosti ili spriječenosti, predsjednika Skupštine zamjenjuje njegov zamjenik sa svim njegovim pravima i ovlaštenjima utvrđenim ovim Statutom.

Skupštinu Sindikata saziva predsjednik Skupštine na osnovu odluke Upravnog odbora. Odluku o broju i kriterijima za izbor delegata donosi Upravni odbor.

Član 16. (Nadležnost Skupštine)

Skupština Sindikata:

- a) donosi poslovnik o svom radu,
- b) donosi Statut, izmjene i dopune Statuta i druge akte određene Statutom,
- c) bira i opoziva predsjednika i zamjenika predsjednika Skupštine Sindikata,
- d) bira i opoziva predsjednika i dva zamjenika predsjednika Sindikata,
- e) bira i opoziva članove Upravnog i Nadzornog odbora,
- f) odlučuje o prestanku rada i drugim statusnim promjenama Sindikata,
- g) donosi programske ciljeve i zadatke Sindikata,
- h) donosi odluku o saradnji i zajedničkom nastupu sa drugim sindikatima i organizacijama,
- i) donosi i druge odluke, zaključke i rezolucije,
- j) odlučuje o svim pitanjima koja nisu u nadležnosti drugog organa ovog Sindikata.

Član 17. (Sazivanje Skupštine)

Redovna Skupština se održava svake dvije godine, a saziva je predsjednik Skupštine na osnovu odluke Upravnog odbora.

Predsjednik Skupštine mora, na pisani zahtjev sindikalnih organizacija koje okupljaju trećinu članova Sindikata, sazvati Vanrednu Skupštinu.

Delegati za Skupštinu biraju se u skladu sa odlukom Upravnog odbora.

Pisani poziv na Skupštinu, sa predloženim dnevnim redom i radnim materijalom, delegatima se dostavlja najmanje 20 dana prije održavanja Skupštine.

Prijedlozi za raspravu na Skupštini trebaju se uputiti Upravnom odboru najmanje 15 dana prije početka Skupštine. Prijedlog za raspravu na Skupštini mogu davati pojedini članovi Sindikata, sindikalne organizacije i organi sindikata, putem delegata Skupštine.

Član 18.

(Rad Skupštine)

Radom Skupštine rukovodi predsjednik Skupštine u skladu sa poslovnikom o radu Skupštine i odredbama ovog Statuta.

Skupštini obavezno prisustvuju delegirani članovi sindikalnih organizacija, članovi Upravnog i Nadzornog odbora.

Skupština može punovažno odlučivati ako sjednici prisustvuje više od polovine delegata sa pravom glasa.

2. UPRAVNI ODBOR SINDIKATA

Član 19.

(Članovi Upravnog odbora)

Upravni odbor ima najmanje 5 članova.

Broj članova Upravnog odbora može biti i veći, ako se ukaže potreba zbog povećanja članstva u sindikalnim organizacijama.

Odluku o povećanju broja članova donosi Upravni odbora na prijedlog predsjednika Sindikata i članova Upravnog odbora.

Predsjednik Sindikata i zamjenici predsjednika su po funkciji članovi Upravnog odbora.

Mandat članova je dvije godine, sa mogućnošću obnavljanja mandata.

Ukoliko nekom članu Upravnog odbora prestane članstvo po bilo kom osnovu, Upravni odbor ima pravo kooptirati novog člana na prijedlog iste sindikalne organizacije.

Član 20.

(Sazivanje i rad Upravnog odbora)

Upravni odbor Sindikata je najviše tijelo između dva zasjedanja Skupštine Sindikata.

Predsjednik Sindikata je, po funkciji, predsjednik Upravnog odbora.

Upravni odbor sastaje se po potrebi, a najmanje dva puta godišnje. Sjednicu Upravnog odbora saziva predsjednik Upravnog odbora po vlastitoj procjeni ili na pisani zahtjev jedne trećine članova Upravnog odbora.

Sjednicama Upravnog odbora predsjedava i rukovodi predsjednik Sindikata, a u njegovoj odsutnosti jedan od zamjenika kojeg predsjednik odredi.

Član 21.

(Nadležnost Upravnog odbora)

Upravni odbor Sindikata:

- a) donosi poslovnik o svom radu,

- b) priprema sjednice Skupštine Sindikata,
- c) usvaja godišnje izvještaje o radu Upravnog odbora,
- d) odlučuje o svim poslovima od interesa za funkcioniranje Sindikata i izvršavanje programskih aktivnosti,
- e) upravlja imovinom i finansijskim sredstvima Sindikata,
- f) provodi politiku, zaključke i druge odluke koje je usvojila Skupština,
- g) utvrđuje osnove za pregovaranje i donosi odluku o zaključivanju kolektivnog ugovora,
- h) donosi pravila o načinu organizovanja i rada sindikalnih organizacija,
- i) donosi odluku o raspuštanju sindikalnih organizacija i sindikalnih odbora koji djeluju suprotno odredbama ovog Statuta,
- j) donosi odluku o sazivanju Skupštine Sindikata i kriterijima za izbor delegata, komisija, organa Sindikata, predsjednika i zamjenika predsjednika Sindikata,
- k) donosi odluku kako će se obavljati funkcija predsjednika Upravnog odbora, predsjednika sindikalne organizacije i sekretara Upravnog odbora (profesionalno, volonterski ili na drugi način),
- l) imenuje sekretara Upravnog odbora na prijedlog predsjednika Upravnog odbora,
- m) donosi Pravilnik o financiranju i korištenju sredstava Sindikata,
- n) donosi odluke o saradnji sa sindikatima i srodnim udruženjima u Bosni i Hercegovini i inostranstvu,
- o) razmatra i analizira rad sindikalnih organizacija i odbora,
- r) donosi sve druge odluke o izvršenju programskih aktivnosti i strategije Sindikata,
- s) donosi odluku o ponovnom prijemu u članstvo isključenog člana,
- š) donosi odluke po žalbama članova Sindikata,
- t) podnosi izvještaj o svom radu Skupštini Sindikata na glasanje,
- u) bira, imenuje i razrješava članove komisija i radnih tijela,
- v) upoznaje se sa završnim računom i izvještajem Nadzornog odbora,
- z) vrši i druge poslove određene ovim Statutom.

Upravni odbor može punovažno odlučivati ako sjednici prisustvuje više od polovine članova sa pravom glasa. Odluke se donose natpolovičnom većinom prisutnih članova sa pravom glasa.

Član 22.

(Sekretar Upravnog odbora)

Upravni odbor može imati sekretara.

Sekretar nije član Upravnog odbora.

Djelokrug poslova i ovlaštenja sekretara utvrđuje se poslovníkom o radu Upravnog odbora.

Član 23.

(Nadležnost i mandat Predsjednika Sindikata)

Predsjednik Sindikata:

- a) zastupa i predstavlja Sindikat u zemlji i inostranstvu,
- b) za svoj rad u Sindikatu odgovoran je Skupštini i Upravnom odboru,
- c) saziva i rukovodi radom Upravnog odbora,
- d) stara se o izvršavanju donesenih odluka i zaključaka Upravnog odbora,
- e) zastupa interese članstva pred organima i institucijama koje odlučuju o njihovim pravima,
- f) saraduje sa sindikatima i srodnim udruženjima u Bosni Hercegovini i inostranstvu,
- g) organizuje pružanje pravne pomoći i zaštite članu Sindikata,

- h) predsjednik Sindikata, u slučaju potrebe, može zakazati sjednicu sindikalne organizacije,
- i) u raspuštenim sindikalnim organizacijama, na osnovu odluke Upravnog odbora, određuje termine novih izbora i određuje povjerenika koji će privremeno preuzeti funkciju sindikalnog organa do ponovnih izbora,
- j) vrši i druge poslove koje mu povjeri Upravni odbor u skladu sa Statutom i poslovníkom o radu Upravnog odbora.

Mandat predsjednika Sindikata je dvije godine, sa mogućnošću obnavljanja jednog mandata.

Član 24.

(Zamjenici Predsjednika Sindikata)

Predsjednik Sindikata ima dva zamjenika, koji ga u slučaju njegove odsutnosti zamjenjuju sa svim njegovim pravima i ovlaštenjima utvrđenim ovim Statutom.

3. NADZORNI ODBOR SINDIKATA

Član 25.

(Članovi Nadzornog odbora)

Nadzorni odbor ima tri člana.

Članove Nadzornog odbora bira i razrješava Skupština Sindikata.

Mandat članova je dvije godine, sa mogućnošću obnavljanja mandata.

Član 26.

(Nadležnost Nadzornog odbora)

Nadzorni odbor Sindikata:

- a) donosi poslovnik o svom radu
- b) vrši kontrolu ostvarivanja politike financiranja, korištenja finansijskih sredstava i ukupne sindikalne pokretne i nepokretne imovine,
- c) kontroliše da li za sve isplate postoje odluke nadležnih organa Sindikata, te da li su finansijski dokumenti potpisani od strane ovlaštenih osoba u Sindikatu,
- d) podnosi pismenu informaciju organima Sindikata nakon izvršene kontrole finansijskog poslovanja.

Nadzorni odbor odgovoran je za svoj rad Skupštini Sindikata.

VII SINDIKALNA ORGANIZACIJA

Član 27.

(Osnivanje sindikalne organizacije)

Sindikalne organizacije se formiraju, po pravilu, jedna ustanova – jedna sindikalna organizacija.

Jedna ustanova može formirati sindikalnu organizaciju ako ima najmanje 10 članova. Odluku o formiranju sindikalne organizacije donosi njena osnivačka sjednica.

Sindikalna organizacija bira predsjednika i članove Sindikalnog odbora.

Organizovanje i rad sindikalnih organizacija regulisat će se posebnim pravilnikom. Pravilnik o organizovanju i radu sindikalne organizacije usvaja Upravni odbor Sindikata.

Član 28.

(Sindikalni povjerenik)

Ustanove koje imaju manje od 10 članova Sindikata, biraju sindikalnog povjerenika. Sindikalni povjerenik preuzima prava i dužnosti sindikalne organizacije.

VIII OBILJEŽJA SINDIKATA

Član 29.

(Znak Sindikata)

Znak Sindikata je trokut zlatnožute boje oivičen plavom linijom. U sredini znaka nalazi se otvorena knjiga sa perom za pisanje.

Član 30.

(Pečat i štambilj Sindikata)

Pečat Sindikata je okruglog oblika prečnika 40 mm sa tekstom ispisanim na latiničnom i ćiriličnom pismu u koncentričnim krugovima oko znaka Sindikata:

- a) prvi krug: Bosna i Hercegovina
- b) drugi krug: Brčko distrikt Bosne i Hercegovine
- c) treći krug: Samostalni sindikat zaposlenih u predškolskom, osnovnom i srednjem obrazovanju

Štambilj Sindikata za protokol pravougaonog je oblika veličine 65 mm x 30 mm, sa prostorom za upisivanje datuma prijema i broja protokola.

Za upotrebu i čuvanje pečata odgovoran je predsjednik Sindikata u skladu sa zakonom i Statutom Sindikata.

IX IMOVINA SINDIKATA, NAČIN STICANJA I RASPOLAGANJA SREDSTVIMA

Član 31.

(Prihodi Sindikata)

Sredstva za obavljanje djelatnosti i ostvarivanje programskih aktivnosti Sindikata čine prihodi od članarine, donacije, dobrovoljni prilozima, pokloni i drugi izvori u skladu sa zakonom.

Član 32.

(Članarina)

Mjesečna članarina u Sindikatu iznosi 0,5 % od neto plaće.

Članarina se obračunava i isplaćuje isključivo putem platne liste (trajnim nalogom), o čemu se vodi uredna evidencija.

Član 33.

(Raspologanje imovinom)

Imovinom Sindikata raspolaže Upravni odbor Sindikata u skladu sa odredbama ovog Statuta.

X KOLEKTIVNO PREGOVARANJE

Član 34.

(Pregovarački odbor)

Za zaključivanje kolektivnih ugovora Sindikat obrazuje Pregovarački odbor koji broji najmanje tri člana. Predsjednik Sindikata je, po funkciji, predsjednik Pregovaračkog odbora.

Kolektivno pregovaranje vrši se sa poslodavcem i odnosi se na ugovaranje radno-pravnih odnosa i drugih pitanja koja se uređuju kolektivnim ugovorom.

Predsjednik Sindikata ovlašten je da potpiše kolektivni ugovor uz saglasnost Upravnog odbora.

XI ŠTRAJK

Član 35.

(Odluka o štrajku)

Pravo na štrajk zaposlenici - članovi Sindikata ostvaruju na način utvrđen zakonom i pravilima o štrajku.

Pravila o štrajku donosi Upravni odbor.

Odluku o štrajku donosi Skupština Sindikata na osnovu pismenog obrazloženja Upravnog odbora, a u skladu sa zakonom i pravilima o štrajku.

Nijedna sindikalna organizacija ne može pozvati zaposlenike - članove Sindikata na štrajk bez prethodne odluke i saglasnosti Skupštine Sindikata.

XII STRUČNA SLUŽBA SINDIKATA

Član 36.

(Administracija Sindikata)

Administrativno-stručne poslove na nivou Sindikata obavlja stručna služba, čiju organizaciju, sastav i broj izvršilaca utvrđuje Upravni odbor.

XIII JAVNOST RADA SINDIKATA

Član 37.

(Javnost rada Sindikata)

Rad organa Sindikata je javan.

Javnost rada ostvaruje se davanjem obavještenja o radu Sindikata sredstvima javnog informisanja i na drugi podesan način.

Podatke i informacije o radu Sindikata i njegovih organa daje predsjednik Sindikata ili osoba koju on ovlasti.

U cilju ostvarivanja javnosti rada i informisanja Sindikat može osnovati vlastito pisano ili elektronsko glasilo u skladu sa propisima.

XIV STATUT I DRUGI OPĆI AKTI SINDIKATA

Član 38.

(Procedura donošenja, izmjene ili dopune Statuta)

Statut i izmjene ili dopune Statuta donose se na način i po proceduri utvrđenim ovim Statutom.

Inicijativu za donošenje, izmjene ili dopune Statuta mogu podnijeti svi organi Sindikata.

Upravni odbor formira komisiju koja će pripremiti novi tekst Statuta, izmjene ili dopune Statuta.

Upravni odbor prije utvrđivanja teksta Statuta, izmjene ili dopune organizira javnu raspravu. Javna rasprava traje 30 dana. Javnu raspravu provodi Upravni odbor.

Na prijedlog komisije, Upravni odbor donosi prijedlog teksta Statuta, izmjene ili dopune koje upućuje Skupštini na usvajanje.

Član 39.

(Opći akti Sindikata)

Pored Statuta, organi Sindikata mogu donositi i druge opće akte, i to:

- a) odluke,
- b) pravilnike,
- c) poslovnike,
- d) program rada,
- e) zaključke,
- f) smjernice.

Opći akti Sindikata moraju biti u saglasnosti sa zakonom i Statutom Sindikata.

Odluke, zaključci, smjernice i program rada, kao opći akti, donose se u slučajevima kada je to izričito utvrđeno zakonom i ovim Statutom, kao i u drugim slučajevima kada se na opći način uređuju pitanja od značaja za ostvarivanje ciljeva Sindikata.

Pravilnikom se na opći način uređuju odnosi između članova Sindikata, kao i međusobni odnosi organa Sindikata u ostvarivanju njihovih nadležnosti.

Poslovníkom se bliže uređuje način rada organa Sindikata u izvršavanju njihovih nadležnosti određenih Statutom.

XV PRESTANAK RADA SINDIKATA

Član 40.

(Odluka o prestanku rada Sindikata)

Odluku o prestanku rada Sindikata, kao i pravila za raspodjelu preostale imovine u navedenom slučaju, donosi Skupština Sindikata.

XVI ZAVRŠNE ODREDBE

Član 41.

(Stupanje na snagu Statuta)

Ovaj Statut stupa na snagu danom ovjere od strane nadležnog organa ovlaštenog da vrši upis Sindikata u registar udruženja.

Brčko, 06. 12. 2018. godine

PREDSJEDNIK SKUPŠTINE
Ibrahim Rizvanović